

Date – 25/05/2026

Time - 7:30 -7:40 Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. MZP chuan Tourism Department Director atana Pi R. Lalrodingi ruat nawn leh a nih duh loh lantir na'n Tourism department hnathawkte pisa kai tur chu vawiin atangin dan an tum.
2. Ramchhunga state hrang hrangah khawlumin zual lam a pan zel lainn Mizoram chuan boruak nuam tak leh ruahtui tha tak a dawng.
3. President Droupadi Murmu-i chuan vawiinah Rashtrapati Bhavan-ah Civil mite chawimawina Padma Award 66 a sem dawn.
4. US President Donald Trump-a chuan Prime Minister Narendra Modia chu a thiantha tak leh a mi ngaihsan anih thu a sawi.



MZP PROTEST

MZP chuan Tourism Department Director atana Pi R. Lalrodingi ruat nawn leh a nih duh loh lantir na'n Tourism department hnathawkte pisa kai tur chu vawiin atangin dan an tum.

MZP general Headquarters hian Inrinni tlai khan inhmukkhawm hmanhmawh kovin Zirtawpni-a Mizoram sorkarin Tourism Director charge la tura Pi R Lalrodingi a ruatna order chhuah nawn chungchang a ngaihtuah a. Thuchhuah siamin hemi chungchang hmalakna kal zelah hian, vawiin Thawhtanni (May ni 25) hian Mizoram Tourism Pisa kai tur dan a rel a ni. Sorkar thuchhuah hi Mizoram mipuite leh zirlaite zah lohnaah a ngai a, he thuchhuah hi sut a nih hma chuan na takin a dodal zel dawn niin an tarlang. He thilah hian MZP chuan, mipuite thlawpna a ngen a. Pisa kai tur dannaah hian, thalai hna zawng mek leh zirlaite tawiawmna MZP chuan a ngen nghal tih an sawi bawk a ni.



HEALTH MINISTER

Health Minister Pi Lalrinpuui chuan Tourism Director atana ruat Pi R. Lalrodingi service chu sawrkarin a mamawh ngawih ngawih avanga ruai nawn an nih thu a sawi.

He thu hi Lunglei HPC Office-a HPC Vice Chairman Pu V. Malsawmtluanga'n Women Icon Award 2026 a lak a lawmsakna-ah Health Minister hian a sawi a. Tourism changa North Eastern Council (NEC) a lo awm

tawh, hnathawhna tur sum pawh chhuah tur hre em em a ni a ti a. Tourism a chan lai khan nasa takin a tanpui ni a sawiin, tuna Tourism Minister Pu Lalnghinglova Hmar pawh a pui nasa hle niin a sawi bawk.

Pi Lalrinpuii chuan Pi R. Lalrodingi chu a pension chuan anmahni Directorate atangin Director kai phak an awm mai loh avangin a remchang thei ang ber tur ngaihtuah in Rs 35,000/- hlawh turin an chelh a ti a, Tourism ah hmalakna tur tam tak, ama hriatpui leh amah in a lo tih avanga hlawhtlinnate a awm avangin chelh leh se tih chu sorkar duhdan a ni tih an sawi a ni.

Pi Lalrinpuii chuan Pi R. Lalrodingi'n Tourism director hna a chelh in Tourism lamah hlawkna a awm dawn avanga ruai annih thu a sawi bawk.

<><><>

WEATHER

Ramchhunga state hrang hrangah khawlumin zual lam a pan zel lain Mizoram chuan boruak nuam tak leh ruahtui tha tak a dawng.

India ram state hrang hrangah tunlai hian khua a lum chho zel a, state thenkhatah phei chuan khawlum lam tehma degree hi 40 atanga 50 te kai chho in hmun thenkhatah phei chuan khawsak a harsat phah hle a, hetihlai hian Mizoram state chuan boruak nuam tak dawngin ruahtui tha tak a dawng a ni.

Akashvani zawhna chhangin Aizawl Meteorological Centre Director Pu Sudheer Kumar Dwivedi chuan ramchhung state dangah khawlumin zual lam pan zel mahse Mizoram leh Kerala State ah chuan fur a intan chho dawn a ti ap, mipuite chu fimkhur tura chahin ina awm tam tur leh pawn chhuak tam lo turin a chah a, leimin theihna hmun te chu pumpelh hram turin a chah a, ruah tam tak sur avang hian district hrang hrangah lei a min thei a ti a, khawchhia avang hian khua a hmuh fiah theih a rinawm loh avangin lirthei khalhtute chu Traffic thuneitute ngaichang a, an thuchhuah te zawm tha turin a chah a ni.

<><><>

DRUGS

Excise & Narcotics department hnathawkte'n kumin January thla leh May ni 21 inkar chhung khan heroin kg. 11 leh gram 85 bakah methamphetamine kg. 56 leh gram 71 an man tawh.

Heroin leh methamphetamine bakah hian ganja kg 113 leh gram 958 an man tawh bawk a. Mizoram thalaite'n an hmansual damdawi chi hrang hrang – khuh damdawi bur 6,770, alprazolam mum 23,414, nitrazepam mum 9,675, clonazepam mum 3,371 leh tramadol mum 5,375 te an man bawk.

He tih lai hian kumin January leh May ni 21 inkar chhung tho hian Mizoramah ruihhlo vanga nunna chan mi 21 (mipa 18 leh hmeichhia 3) chhinchhiah an ni tawh bawk a ni.

<><><>

HIGHWAY ROBBERY

May ni 20 zana Lunglei district Thaizawl bula hnamdang truck khalhtu lo suamtute chu Lunglei District Police-te'n an zawng zui zel.

Lunglei district SP Pu J. Lalmuankima Hmar chuan hnamdang truck khalhtu lo suamtute mi 2-te hian Thaizawl a Myanmar raltlante awmna hmun atanga hla vak lovah an lo suam a. Mahse, he thilah hian thenkhatin an puh angin raltlan thiltih a ni tih finfiahna a awm lo niin a sawi a. An suamte hian anmahni suamtute hmel leh pianhmang an sawifiah chian theih loh avangin suamhmang zawn chhuah hi a harsat phah niin SP chuan a sawi a. Tualchhung mite leh Police tangrualin thil thlenna chhehvel ramngaw leh raltlante awmna pawh an dap chungin misualte hi man an la ni lo.

Truck khalhtute hi Lawngtlai pana an kal lai-in mi pahnihin lo tidingin chemte hmangin an bei a. Pawisa leh a lehkha pawimawhte chhuhsakin an bibo zui a ni.



MISSING ANIMALS

Aizawl Zoological Park awm tirh atangin ramsa/sava 12 a bo tawh a, tun thlengin hmuh let an la awm lo.

Aizawl Zoological Park hotuten Akashvani Aizawl News zawhna RTI hmanga an chhan danin, kum 2006 November ni 24-a Aizawl Zoological Park, Sakawrtuichhun din a nih atang khan ramsa/sava 12 an bo tawh a. Chu'ng zingah chuan Rufous Hornbill, Lear Macaw leh Pesquet Parrot an tel tih sawiin, tun thlengin hmuh let an la nei lova, pakhat an la zawng mek tih an sawi a ni. Aizawl sahuana ramsa/sava bo te hi Police Station-a FIR thehluh bakah CID leh Mizoram Police uisathiam hmang te in zawn thin an nih thu sawiin, tun thlengin a chhuina (investigation) result hlawhtling tak an la hmuh lo tih an sawi a. Ramsa/ sava bo chungchangah hian thawktu emaw pawnlam mi emaw man an la awm lova, thawktute lakah hremna lek a la awm lo bawktih an sawi a ni.

Kumin January thla thleng khan Aizawl Zoological Park-ah hian ramsa chi hrang (species) 38 awmin a vaiin ramsa 172 leh sava 8 an awm a. Heng zingah hian ram pawn atanga lakluh (exotic animal) chhiar tel a ni lo thung. Sahuana ramsa te hi Mizoram chung ami te bakah Central Zoo Authority pawmpuina a state dang sahan atanga ramsa te nen inthleng thin a ni a. Tun dinhmunah Sahanah hian a hmunah enkawltu mi 31 an awm mek a, an indaih lo hle tih thuneitute chuan an sawi a. Kum 2025 April thla atanga kumin March ni 2026 chhung khan tlawhtu mi sing 3, sang 8, 125 an awm a, October thla atanga March thla bawr vel chu Sahan tlawhtu an tam ber hun lai a nih thu an sawi a ni.



HOLIDAY

Mizoram Sawrkar in chawlh ni atana May 27 a lo tarlan tawh, Id-Ul-Zuha (Bakrid) chu May 28-ah hman a nih dawn tak avangin, sawrkar chawlh chu May 28, 2026 (Ningani) ah sawn a ni tih Inrinni khan GAD chuan thuchhuah a siam.

Department of Personnel, Govt. of India, Ministry of Personnel, Public Grievances and Pensions, New Delhi-in ni nikum July ni 3-a Office Memorandum a chhuah competent authority chuan Id-Ul-Zuha (Bakrid) Holiday chu May ni 27 (Nilaini) atangin May ni 28 (Ningani) — Zil Hajj thla ni 10-na-ah sawn a phalsak a ni. Hemi ni-ah hian Sawrkar pisa zawng zawng, sorkar hnuaia corporation zawng zawng, zirna in leh bank lam chi zawng zawngte chu khar vek a ni ang.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

FISHERIES

Fisheries, Animal Husbandry & Dairying (MoFAH&D) leh Panchayati Raj changtu Union Minister Pu Rajiv Ranjan Singh, Lalan Singh ti a koh bawk hovin wawiin hian Aizawlah “Regional Review Meeting: Northeastern Region 2026” buatsaih a ni dawn a, cheng vaibelchhe 32 leh nuai 15 hu project hawn a ni bawk ang.

He inkhawmah hian Union Minister of State for Fisheries, Animal Husbandry & Dairying and Panchayati Raj, Prof. S.P. Singh Baghel, leh Union Minister of State for Fisheries, Animal Husbandry & Dairying and Minority Affairs Pu George Kurian te bakah hmarchhak state - Arunachal Pradesh, Assam, Manipur, Meghalaya, Mizoram, Nagaland, Sikkim leh Tripura a an Fisheries leh Animal Husbandry minister leh secretary te an tel ang a. Central leh state sorkar official-te pawh telin a then a hmunah awmin a then chuan biakhmuhtheih hmangin an chhim dawn a ni. Inkhawm hi MINECO a High Court Hall-ah chawhma dar 10 a tan tura ruahman a ni. Hmarchhak state hrang hranga hmasawna hna chungchang thlirlet bakah hian MULCO-in bawngnute atanga ghee an siamchhuah khuh hawna leh Mizo Cafe hawna hun hman a ni bawk ang.

Union Minister hian Pradhan Mantri Matsya Sampada Yojana (PMMSY) leh Fisheries and Aquaculture Infrastructure Development Fund (FIDF) hnuai a cheng vaibelchhe 32 leh nuai 15 hu senna tur ruahmanna lung a phumin a hawng bawk ang a. Hei hi hmarchhak biala sangha khawi lam hmasawna tluantling awm theihna atana sorkar ruahmanna a ni a.

He huna tel tur hian Union Minister hian nimin khan Aizawl a lo thleng a. Khaw chhiat avangin a hunah Lengpui tumhmunah thlawhna a tum thei lova. Agartala atanga khaw chin an nghah hnu-ah chawhnu dar 4 pelhah khan a lo tum thei hram a ni.

<><><>

PADMA AWARD

President Droupadi Murmu-i chuan vawiinah Rashtrapati Bhavan-ah Civil mite chawimawina Padma Award 66 a sem dawn. Padma Award hlanna inkhawmah hian Vice President C P Radhakrishnan, Prime Minister Narendra Modi, Union Home Minister Amit Shah leh mi pawimawh dangte an tel dawn a. President hian Padma Vibhushan pahnih, Padma Bhushan paruk leh Padma Shri 58 a sem dawn a. Kuminah hain President hian Padma Award 131 sem turin a pawm a. Vawiina sem bak hi remchang dangah sem leh a ni ang.



TRUMP

US President Donald Trump-a chuan Prime Minister Narendra Modia chu a thiantha tak leh a mi ngaihsan anih thu a sawi. Nimin khan President Trump-a hian New Delh-a Bharat Mandapam-a America zalenna kum 250-na lawmnaah US Ambassador Sergio Gor bia in he thu hi a sawi a. India leh US inkar chu tun hma zawng aiin a tha a ti a. Pu Trump-a chuan zaa zain India-in an ringgam theih thu a sawi a ni. America zalenna kum 250 na lawmna hi External Affairs Minister S.Jaishankar leh US Secretary of State Marco Rubio te pawhin an telpui a ni.

